

重樓玉鑰

嘉慶乙亥春余家居無事日取醫書玩味適友人過訪
出重樓玉鑰示曰此書無刻本子錄一帙存閱因索而
讀之恍然有悟後凡遇喉症惜未解鍼灸僅按方按藥
無不神驗鄉黨知有此書時借抄寫而流傳未廣其中
魯魚亥豕指不勝屈惟以意更訂一二餘則闕如也原
序不系姓氏謂作者爲鄭梅澗先生亦不知何許人然
辨證施治各具神妙非懷濟世之婆心者孰能與於斯
今年夏吾津時疫流行患喉症者極多而治不得法往
往受害余閉戶養痾未能遍告鄰里私衷歉然因與弟
輩謀將此書再錄稿本寄至吳門託孫君樸齋校訂付

之剗則此後人人得所指南患者卽不延醫而對證
檢方諒亦不致天枉余心庶稍慰矣

道光十八年歲次戊戌仲秋上澣津門馮相棻識

人之一身百症皆可致危獨咽喉之症尤危之危者不
炊黍間斃可立俟雖居近良醫之門旋發旋治猶若恨
晚而林荒山僻之境更可知已余甚憫焉余不知醫而
遇古方之百試百效爲人人所傳播者手鈔成帙或刊
附善書或鋟刷片紙以贈人咽喉科一門流傳者當不
下數十種獨喉科經驗秘傳爲程君瘦樵定本業是科
者大半宗之僉謂外此罕有其匹者一日黃君竹亭自
津門寓書於余謂馮君石農丹崖昆季秘藏重樓玉鑰
一書爲喉科指南亟欲付梓以公諸世而近處尠良工
君客吳門久當易物色且君亦樂爲之常若不及竊欲

以此事浼君可乎余聞之距躍三百亟思覩是書冀是書之速成而廣行於世也促其寄余不兩月而書至其間或鍼或藥諸法賅備足以補經驗秘傳所不及洵喉科中之見所未見者爰爲之選工開雕慎校讐以期無負良友之委任而副良友濟世之婆心也竹亭向與余同客燕臺嗣而客吳閶客由拳里皆同几硯無間臭味蓋恂恂然篤行君子也丹崖與余亦曾晤於京邸樂善不勸見義必爲常隱躍於眉宇間其兄石農則余所願見未能者然聞其作令山右也有能吏聲有生佛頌余固久信之且卽於與丹崖之同梓是書而益信之也書

成索序於余余不知醫又何敢論醫之書然其書則固
百試百效而當爲人人所傳播者也余竊願罄竹而印
是書使人人挾是書以防患於未然微特林荒山僻之
境不能入市問藥者不啻家有一醫卽居近醫者之門
而旣有此百試百效之書亦較愈於踵其門而求試其
萬有一效之技矣是卽石農諸君梓是書之意也夫
道光十有九年歲次己亥花朝後一日桐鄉孫學詩謹
序於吳門之石泉古舍

原敘

古人有言左手據天下之圖右手刎其喉愚夫不爲何則天下雖大未若吾身之可貴也故天下有心性之書人心之所以死生存亡者也有醫藥之書人身之所以死生存亡者也故六經四子而下莫貴於醫藥之書夫神農致辨於上藥中藥下藥周禮垂訓於五氣五色五聲自古聖賢明哲之士未有不留心於此者今之所謂喉科特大方中一事耳然其生死決於數日安危判於頃刻關係最大而世之業是科者率學無根柢不得真傳株守寒涼膠於偏見有識者不許也吾鄉鄭梅澗先

生性好岐黃家言其先世得喉科祕授故於此尤精遠
近無不知之救危起死不可勝數余常見有垂斃者先
生刺其頸出血如墨豁然大愈其妙如此而未嘗受人
絲粟之報惟以利人爲急殆亦范文正陸忠宣之意歟
先生祕惜此書又恐人乘危邀利故未嘗授人余幸得
閱一二故喜而敘之夫天下重器尊生者不以身易而
是書之澤利濟無窮則其貴重宜何如也

重樓玉鑰卷上目錄

咽喉說

喉科總論

諸風祕論

陰陽論

辨面色論

裏症須知

論證

附纂咽喉不治症

喉風三十六症名目

重刊三金
卷一
一
祕訣

喉風諸方

證治湯頭

附治走馬牙疳

附錄梅澗論症一則

論喉間發白症

又論發白治法及所忌藥

附喉症禁忌

附暫受風寒喉痛

重樓玉鑰卷上

咽喉說

呼者因陽出吸者隨陰入呼吸之間肺經主之喉嚨以下言六臟爲手足之陰咽門以下言六腑爲手足之陽蓋諸臟屬陰爲裏諸腑屬陽爲表以臟者藏也藏諸神流通也腑者府庫主出納水穀糟粕轉輸之謂也自喉嚨以下六臟喉應天氣乃肺之系也以肺屬金乾爲天乾金也故天氣之道其中空長可以通氣息但喉嚨與咽並行其實兩異而人多惑之蓋喉嚨爲息道咽中下水穀其喉下接肺之氣一云喉中三竅者非果喉中具

三竅則水穀與氣各從一竅而俱下肺中肺下無竅何
由傳送水穀入于下焦黃帝書云肺爲諸臟之華蓋藏
眞高之氣于肺經也故清陽出上竅濁陰出下竅若世
人不知保元風寒暑溼燥火之六氣喜怒憂思悲恐驚
之七情役冒非理百病生焉病瘍旣成須尋所自若喉
痺乳蛾纏喉風喉閉喉瘡風毒熱毒等症當刺者則刺
不可亂醫宜吐者則吐不可妄治須識其標本辨其虛
實而攻導之不失其法臨症變通功效立見其患自安
至于虛損勞瘦咳傷咽痛者此乃眞陰虧竭金水不能
相生而龍雷之火奔騰上灼火炎則金傷金傷高原無

以蒸吻布漚而咳血聲啞咽痛乾緊之症作矣吁如症至此不惟非法可治且百無一生可勝言哉

喉科總論

夫咽喉者生于肺胃之上咽者嚥也主通利水穀爲胃之系乃胃氣之通道也長一尺六寸重六兩喉者空虛主氣息出入呼吸爲肺之系乃肺氣之通道也凡九節長一尺六寸重十二兩故咽喉雖並行其實異用也然人之一身惟此最爲關要一氣之流行通于六臟六腑呼吸之經若臟腑充實肺胃和平則體安身泰一有風邪熱毒蘊積于內傳在經絡結於三焦氣凝血滯不得

舒暢故令咽喉諸症種種而發苟非見症隨治則風痰
愈盛熱毒日深漸至喉間緊閉水洩不通幾何而不殞
命耶大抵風之爲患好攻上而致疾者三十六症內關
咽喉爲第一

諸風祕論

有人云喉風無非熱症便亂投涼劑或誤用刀鍼天枉
人命者眾矣若識症真先治而後調理百發百中有可
吐者有可下者有可發散者有可洗可漱者苟若識症
未真切勿孟浪如雙鵝單鵝重舌木舌重腭雙纏喉單
纏喉爆骨搜牙諸症乃是惡症善候則易治雙松子單

松子雙燕口單燕口魚鱗斗底帝中落架魚口穿領諸
症此是善候惡疾則難治合架角架粟房瘰癧掩頸雙
搭頰單搭頰雙單燕口內外搜牙乘枕驢嘴懸瘕魚腮
咽瘡牙癰又喉邊頭痛奪食肥株子諸風此是善症善
候但要症候認真隨輕重治之不可誤投涼藥若用鍼
刀俱要逐一對症先用藥降定然後下藥調理如此等
症務須依方進藥未可速於求安則輕者一七重者二
七自能取效卽信心諸藥仍須仔細詳察不可輕忽大
凡用藥自內攻出爲上策取痰攻上爲中策沉爲下策
熱重者令去內熱用藥取病歸上攔定風熱使其攻上

不下誠爲善治者不如是則病入胃鬲因傳于心肺中
輒變他症是醫之罪也切宜畱心詳審慎毋輕率焉
咽在後主食喉在前主氣十二經中惟足太陽主表別
下項餘經皆內循咽喉盡得以病之而統在君相二火
喉主天氣屬肺金其變動爲燥燥則塞而閉咽主地氣
屬脾土其變動爲溼溼則腫而脹皆火鬱上焦致痰涎
氣血結聚于咽喉腫達于外麻癢且痛而緊是爲纏喉
風紅腫于兩旁兼閉塞是爲喉痺

陰陽論

經云癰從六腑生疽從五臟出皆陰陽相滯而成氣爲

陽血爲陰血行脈中氣行脈外相並周流寒溼搏之則凝滯而行遲爲不及火熱搏之則沸騰而行速爲太過氣鬱邪入血中爲陽滯于陰血鬱邪入氣中爲陰滯于陽致生諸症惡毒然百病皆由此也

凡頭痛不止者屬外感宜發散乍痛乍止者屬內傷當

補虛又有偏頭痛者非邊頭風當審之左屬風與血虛右屬痰

熱與氣虛

辨面色論

色青者病屬肝合散血色黃者病屬脾滯宜消食色赤者病屬心合散血清火色白者病屬肺宜順氣色黑者

重刊三金
病屬腎虛當滋補以上所論五色乃就諸風病症愈後
而言以識調理本經也

壞症須知

喉內生風莫待遲胸中氣急主傾危更加心脇如刀刺
妻子親朋定別離大小便中添祕結病人魂魄去如飛
此是醫家真妙訣預將生死報君知

病人眼直口開時氣出無收手散垂若見此形宜速退
休貪名利自狐疑

翻唇魚口誤鍼時不日黃泉實可悲此症亦名爲惡症
盧醫遇著也難醫

論證

凡屬喉風之症預先必作寒發熱甚則大便秘結小便
濇赤頭痛煩渴時醫不識妄以羌活藥味投之不知羌
活乃散寒邪達肌發表之品非喉科所宜用故是書所
定紫正地黃散專治一切諸風無不神效誠妙祕也

附纂咽喉不治症

一凡虛陽上攻者四肢厥冷上下不升降水火不既濟
腰冷不知痛癢口中痰多唇黑者不治

一凡手足冷者聲音不響喉中腫爛乾痛無痰涎者不

治

一凡婦人產前咽喉腫痛及心頭疼而脈浮者不治

一面赤而目睛上視者不治

一面色青白眼目無神咽痛音啞唇白鼻扇者不治

一面黑頭自汗而鼻塞者不治

一心胸緊滿吐痰不出者勿治

一氣喘促四肢厥冷勿治

一心中忙忡胸前紅甚舌捲面赤浮腫目斜視者不治

一潮熱往來時發譫語不治

一胸滿脹急不治

以上皆屬咽喉中險凡患喉風遇有現此等症者

宜詳察早回以免後咎醫者慎諸

喉風三十六症名目

斗底風 叉喉風 咽瘡風 魚鱗風 雙松子

單松子 帝中風 雙鵝風 單鵝風 雙燕口

單燕口 重腭風 木舌風 重舌風 坐舌蓮

合架風 角架風 爆搜牙 牙癰風 懸癰風

奪食風 魚口風 驢嘴風 魚腮風 雙搭頰

單搭頰 落架風 栗房風 瘰癧風 穿頰風

肥株子 掩頸風 雙纏風 單纏風 邊頭風

乘枕風

斗底風

欲識人間斗底風十分紅腫在心胸更加痰壅咽喉內
鍼藥無功命必終

此症初起吞嚥不下但胸前紅腫漸至結喉一時難安

初起能嚥水者可治先用角藥加摩風膏少許冷井水

調擒取痰次開風路鍼

所謂開風路鍼者蓋喉風都是風邪按穴鍼刺開其風壅之路

使之外出也

三吹冰硼散四用紫地湯如病勢緊急湯水不

能下遍身作痛氣喘眠臥不得循屋下行胸前赤腫凡

吐痰涎後仍不退者百無一治每初起胸前便現青筋

須用破皮鍼

卽鍼也

鍼青筋邊立效

樞扶氏曰是症宜用雄黃解毒丸服之吹赤麝散

又喉風

又喉之症最爲殃遲了三時命不長病者能依方法治
管教依舊進茶湯

男子婦人喉內生此疾者極爲急症先咽喉作緊風痰
上湧多有綿涎內緊外浮腫不能飲食漸至咽喉緊閉
如又又住甚則頭面浮大其患最速宜急治之若一二
日不知治者多致殞命先用冰硼散開竅次用風路鍼
三用摩風膏少許和角藥調噙取喉內痰涎並用角藥
敷頸外浮腫處服紫正散加開關散如病勢已極不能

開關者不治

按此症既速凡初起當用赤麝散吹之其效更捷

咽瘡風

咽喉此症不爲良黃爛成瘡作禍殃依法頻施無效處
必然長夢入黃梁

初起生咽喉間或紅黃色如粟形者日久滿喉成瘡及
滿口生者漸變紫黑不能吞嚥先用角藥次開風路鍼
服紫地散以冰硼散吹之卽效惟風熱實症可治若內
傷咳嗽吐血後而發此症者切不可用此等藥致枉人
命也

樞扶氏曰按咽瘡一症雖曰真陰虧竭相火薰灼上升
咽喉發爲咽瘡最爲虛損惡症然其間虛實陰陽亦當
分別治之凡屬實症由于風熱者必須發熱惡寒瘡色
紅黃右脈浮數有力因病人平昔過食煎炙蘊積于胸
膈今又新受風邪感觸而發治宜以喉科諸藥投之自
然獲效若虛症形色白而乾燥不潤內熱口渴飲食微
少疼惟嚙津液其痛更甚此由真陰已虧虛損所致然
內傷有二種一屬氣虧爲陽虛一屬血虧爲陰虛陽虛
者兩寸浮數遇勞益甚而行動則氣喘此脾肺氣虛窮
及腎水須培補中土庶無差誤今時醫不識以清涼利

痰之劑治之遂致喉間變生咽瘡頓成不治之症若陰虛者兩尺洪數重按無力現于外者內熱咳嗽吐痰衄血或飲食日減此肝腎陰虛不能蓄養龍雷真火蓋陰虛則火旺火旺則水竭水竭則腎元枯涸腎元枯涸則相火奔騰而浮上斯喉痺咽瘡痰結煩燥聲啞之症作矣俗曰火燒竈門是也其時若以六味補水真水不能驟生以生脈保肺而久炎之肺又非參麥能療以八味降火而咽喉之地難受桂附之性以滋腎丸互治水火而水火不能既濟惟急用甘露飲治之使水火各安其位得以濟其源而安其流能導龍歸海使五行自有相


生之象然後再按脈察色分別治之或八味六味或歸脾養榮諸方佐之自然獲奏神效稱爲靈丹然患者亦當早治勿待病入膏肓雖有神丹亦無濟也

魚鱗風

喉間忽爾患魚鱗多少醫家不識真此症若求痊愈易只須鍼藥貴于頻

此症生在帝中之下與松子風相似但微腫處起白點日久白點變成鱗其鱗向下者是用冰硼散赤磨散開風路鍼服紫地湯以角藥加摩風膏調噀不可用刀此症極險難治治與雙松子同初起未成鱗易治若已成

鱗則飲食到喉俱作嘔惡乃屬不治或內傷咳嗽而發
斯症者萬無一治○如大便秘結不通湯中須加犀角
木通元明粉以角藥冰硼散赤磨散相間吹噙勿斷用
鵝毛多挑角藥入帝中旁含少頃再絞取痰涎吐出自
然獲效



雙松子風

松子風生喉膈中逐時脹大起鱗紅莫言此症多遭險
隨卽療施亦見功

此症生靠帝中下邊初起兩邊紅紫如粟形大逐時脹
腫起鱗向上者是漸長如菜豆大似松子一樣甚至黃
皮裹住及有蓮子大者斯難治矣先開風路鍼服紫地
湯加銀鎖匙開關散用角藥加摩風膏調噲吹冰礪散
治與魚鱗風同二三日若轉紅爲黃就怕起鱗須以角
藥頻噲勿離依法治之亦不可用刀此症與魚鱗風皆
屬險症勿得輕視也

單松子風

單名松子一邊生左屬心兮右肺金鍼藥交施依法治
自然奇效立消平

此症生在帝中下一邊腫者是或生左或生右亦不可用刀治法與雙松子同惟生左者湯中倍加丹皮赤芍右者倍用桔梗連翹

帝中風

時人忽患帝中風角藥頻噲自見功若遇庸工無識輩鍼刀誤用命隨終

初起紅腫作痛生痰不能飲食日久漸長大出來甚有長出寸許攔腰爛去半截或帝中全行爛去者雖一時難治仍爲無害只依法治之亦見奇效若初起先以角藥取痰開風路鍼吹冰硼散服紫地湯不可用刀如日

久帝中黑爛者回生丹不宜用當以真功丹去牙硝吹之或口疳散聖功丹皆可互用至於水劑又當以紫地加減出入投治不可執拘呆方也

雙鵞風

乳鵞紅腫在喉間病者求痊亦不難角藥頻施兼服劑自然取效莫愁煩

凡咽間紅腫似癰毒兩枚而生在兩邊者是爲雙鵞切勿誤用刀先以摩風膏少許入角藥井水調噙又以鵞翎挑入喉間癰毒上令病人閉目噙良久俟滿口痰來吐出再吹赤麝散服紫地湯自然立效如日久癰毒未

平仍似蓮子樣須用消蘆散加巴豆七箇去壳熏患處
如熏破後只可用呂雪丹

樞扶氏曰喉間諸症惟患雙單鶩甚多症候雖輕易治
却難速於平消邇來庸醫不識欲求速效每妄用鍼刀
反致枉人命者亦復不少今附叅而訂之俾後世治者
庶不致有誤蒼生耳蓋此症由肺經積熱受風邪凝結
感時而發致生咽喉之旁狀如蠶蛾亦有形若棗栗者
紅腫疼痛不能吞嚥然形有雙有單雙者輕單者重凡
初起先用三稜鍼刺少商少冲留三呼吸入一分吹赤
麟散以角藥調噙仍服前藥緩緩取效凡鍼法以男左

女右若要速效以捷妙丹吹入鼻中卽消然初起神效若日久者不外消蘆散

單鶯風

左畔虛陽熱上攻乳蛾單重喉旁風關前易治療須急關後生兮施不同

此症生在帝中之旁如蓮子樣左屬心右屬肺治法與雙蛾同亦不可用刀

樞扶氏曰此症有部位之分有虛實風熱氣鬱之別凡生于帝中兩邊者是雙單蛾屬關前實症爲易治若起于咽喉內者名喉瘤屬關後氣鬱虛症却難治時醫不

識概以驚症治之安能獲效然喉瘤由肝肺二經鬱熱
更兼多語損氣性躁而成形如圓眼紅絲相裹或雙或
單生于喉內之旁亦有頂大蒂小者初起喉間微痛不
惡寒發熱日久形色帶白而微硬不犯不痛或因醇酒
炙燂或因怒氣喊叫犯之則痛切忌用鍼刀吹以消瘤
碧玉散宜服加味逍遙散益氣清金湯或用夏枯草同
鬱金煎湯代茶服之日久自然消退若體虛因憂鬱不
舒而發是疾者宜用歸脾湯加柴胡丹皮山梔至于出
入加減之法又當神而明之可也

雙燕口風

燕口生在帝中旁欲嘗飲食不能殮鍼刀善施無差誤
功效旋收亦不難

此症生在帝中兩邊靠于上腭左右俱有皆紅腫不能
吞嚥甚至腫出舌上來連舌亦痛用刀之法宜靠腫處
將刀輕輕刺破切不可深若上腭中間及燕口形上切
勿將刀誤用先以角藥取痰次開風路鍼吹回生丹服
紫地湯

樞扶氏曰此症初起只須吹赤麝散勝用角藥鍼刀多
多矣內仍服紫地湯加開關散火甚量加石膏此余屢
經收效者也

單燕口風

單名燕口一邊生治法同前不用更慎使鍼刀毋誤及赤磨吹上立奇功

是症或生左或生右亦有腫上舌來不能飲食者甚則將帝中擠往一邊了治法與雙燕口同

重腭風

口內生來上腭浮心脾有熱積成愁倘然七竅流膿血縱遇盧醫未必瘳

此症生在上腭靠帝中之上位紅腫不能吞嚥症雖重却可治以角藥調噙內消爲貴如不得消直腫到牙牀

邊者可用破皮刀輕切出血若上腭中間乃七孔相連之處萬勿誤用刀宜吹冰礪散服紫地湯開風路鍼如口耳鼻中有一處出膿血者卽是病延日久熱毒蘊蓄以致腐穿七竅此誠不治之症

樞扶氏曰重腭者皆由心脾二經積熱而成倘病日久前藥治之不效宜用紫雪散治之服黃連解毒湯卽效

木舌風

口中舌表腫兼紅熱積心脾發是風丹散頻投依法治管教立刻見奇功

初起舌頭紅腫不能轉動漸至飲食不能迎送言語不

便可用破皮刀於舌下弦兩邊無筋處刺之

筋上不可刺刺傷立

死

先用角藥加摩風膏少許吹冰硼散服紫地湯自效

重舌風

重舌風兮亦不祥或生左右或中央專家有訣通元妙
善使鍼刀割不妨

凡舌下又生一舌漸比正舌尤長以致正舌不能轉動
用角藥取痰吹冰硼散服紫地湯可用破皮刀須按舌
旁邊下弦先破一邊如不效再破一邊

樞扶氏曰此症無論大人小兒皆由心脾蘊熱循經上
冲舌本遂令舌下血脉脹起如小舌狀故名重舌用刀

之法先將角藥加摩風膏噙久吐出再將腫患刺破卽吹回生丹或紫雪散並獲效

坐舌蓮花風

舌坐蓮花六七尖心家風火搏相炎莫將斯症尋常看日久纏綿最可嫌

舌下浮腫多痰涎初生一二瓣漸至五六瓣形似蓮花凡兩邊尖瓣者可用刀若中間一瓣尖者切不可用刀蓋人舌下中間俱有一筋直連上下乃心之苗所以切不可用刀者恐誤傷筋則枉人命匪淺也先用角藥調敷舌下取痰涎再將冰硼散挑上服紫地散重加連翹

症甚者外用氣鍼自然取效

樞扶氏曰蓮花證乃蘊熱乘風而發于心舌本屬心又爲心之苗心火上炎或思慮太過或酒後當風受寒以致風痰相搏而成是症也

合架風

合架風生齒盡頭牙關緊閉病難休若還不識鍼刀法患者如何得便瘳

此症生在上下牙牀兩根頭勾合之處起一紅核腫痛牙關緊閉不能開口先用角藥調噙次用破皮刀切紅腫處吹冰礪散赤磨散可用消蘆散熏之

角架風

風名角架不爲嘉腫痛須知藥可加昧却箇中眞妙訣
任他肘後秘方誇

是症生上下牙牀盡處根上浮腫以致閉口不便兩齒
難合咀嚼艱難初起生在一邊或延生兩邊者治法同
合架風可用破皮刀切腫處卽效

爆骨搜牙風

爆骨搜牙疾勢驕聲聲痛楚費推敲金鍼已度依方法
功效隨收心莫焦

牙匡之上逐齒紅腫骨中極痛不可忍者名爲爆骨搜

牙若通牙牀上紅腫或在外牙牀腫者或在內牙牀紅腫口內作燒生痰名搜牙風若有面紅腫者恐成粟房風症部位雖分內外法宜同治先用角藥調噙吹冰硼散服紫地湯次以鍼挑牙縫中有紅紫血管者卽要挑斷出血若爆骨搜牙每齒腫處俱要用破皮鍼鍼出血卽效如症在牙牀內者必須腫起牙上方可用刀

牙癰風

牙匡生癰是牙癰上下生兮總共同但用破皮鍼出血更加角藥有奇功

凡牙匡生癰毒或滿匡紅腫或一處紅腫先用冰硼散

以角藥調噙服紫地湯凡牙癰搜牙兩症以牙牀高低
界爲辨在牙牀上高處爲搜牙在牙牀下低處爲牙癰
此症亦有內外生者皆可用破皮鍼鍼去膿血自效
樞扶氏曰此症由陽明胃熱毒所致初起身發寒熱腮
頰浮腫紅痛者當以前法治之若初起往往有誤認牙
疼等症過服寒涼清火之劑以致堅腫色淡自破流黃
水日久爛至牙根及延爛咽喉名曰骨槽風又名附骨
一名穿珠法當用二陳湯加陽和丸煎服或陽和湯消
之倘遇潰者以陽和湯犀黃丸每日早晚輪服倘有多
骨以推車散吹入隔一夜其骨不痛自行刺出須俟骨

尖退出搖則內動方可漸次取下再吹次日無骨退出
卽以生肌散吹入內服保元湯加肉桂歸芎芪草宜生
自然獲效收功而愈矣

凡骨槽風者初起牙骨及腮內疼痛不腫不紅惟腫連
臉骨者是骨槽風也然齒症不一有齒蠹者是蟲蝕齒
至斷由胃經瘀滯風火凝聚而成齒根脹痛腐爛時出
膿血臭汁也有齒齲者亦以陽明入風熱之邪搏齒斷
氣血腐爛爲膿血臭汁謂之齒齲音拒亦云風齲有齒歷
蠹者由骨髓氣不能榮盛故令齒黑黯謂之歷齒皆由
陽明之所致而治法各異俱詳注續集焉

懸癰風

牙牀浮腫號懸癰外症能療內症危爛及咽間妨飲食
蓬萊妙藥亦難施

凡牙匡下浮腫爲外懸癰起生牙根內爲裏懸癰紅腫
如蜒蚰樣漸次而長先用角藥調噙吹冰硼散服紫地
湯初起可用破皮鍼日久不宜鍼

刺紅腫處出血效若
白爛者不可用鍼

凡外懸癰屬善症易治生于內屬惡症却難治稍醫差
遲卽能傷人若白爛延至咽喉及落盡面頰肉者不治

奪食風

卽噎食風

噎食還將奪食名舌根喉腭陡然成休驚是疾無方法

重刊三集
卷一
善使鍼刀泡立平

此症或因飲食火物觸動肺胃積熱致陡起斯症或在喉頭上腭及舌根左右生一血泡或數小泡卽變大脹滿不能吞嚥氣息不能出入急以竹鍼挑破咯出紫血卽吹赤磨散或回生丹其泡若起喉內不能用鍼刀挑破只須氣鍼鍼百會前頂後頂三穴內泡自平

魚口風

魚口生來一片浮心家有熱夜啁啾上冲痰氣醫當急莫待深沉始怨尤

凡上唇生小瘡或一二枚者初起紅腫漸至下唇亦腫

及面頰俱浮若初起紅赤發熱作癢癢後起小黃泡切勿用破皮鍼如生在上唇中間者難治若上唇赤腫直長出者名龍唇發可鍼兩鼻角又一症上唇生小白紅瘡乾燥常欲以舌舐唇上亦不可鍼又一症唇上直痛入骨連頰俱痛不可忍可鍼鼻角又一症不浮腫只口眼喎斜轉過一邊名轉喎風此症宜鍼合谷頰車二穴以上諸症先以角藥調敷吹呂雪丹服紫地湯加犀角大凡唇皮生瘡初起者不可以鍼妄挑破若誤鍼之身必潮熱滿身骨節疼痛不治如用鍼刀必須依法律切勿妄任己意施爲至要至要

驢嘴風

驢嘴風生在下唇逐時腫大不堪論更加作痛如刀刺敷藥頻施效自神

初起下唇生一紅瘡逐時腫大漸至下唇長出用消蘆散熏服紫地湯吹冰硼散可用破皮鍼鍼破卽效鍼法須認兩旁腫處鍼之

魚腮風

魚腮疾染在腮頤腫痛難當只自知傳訣與君依法治免教遲慢勢難支

是症生在酒腋邊兩腮浮赤紅腫爲雙魚腮一邊紅腫

者爲單魚腮治法以角藥調敷或用消蘆散熏服紫地湯噙冰礪散如逐日紅腫極盛方可用破皮鍼鍼出血仍以角藥外敷倘症日久腮穿出膿者須內服蠟磬丸外敷生肌散

雙搭頰風

風名搭頰兩邊浮赤腫難當筋似抽若遇此風非易治值時敷刺莫移游

初起面頰兩邊紅腫發熱惡寒須看口內牙上有腫無腫如牙匡腫者不是搭頰乃是牙風卽以牙風法治之若屬搭頰先用角藥外敷服紫地湯重加連翹桔梗牛

莢子如腫仍不消宜用破皮鍼出血不可鍼挑深外仍
不離敷藥加摩風膏少許

單搭頰風

一邊紅赤頰名單證治如雙母用叅日久腫浮牙亦腫
外敷角藥內噙丹

面頰一邊浮赤腫痛或日久致牙匡亦腫痛須以角藥
外敷內噙吹回生丹服紫地湯

落架風

落架風兮信不良總因血氣暗中傷搭勾合上方無事
不合匡時費酌量

此症或因酒後或偶大笑或大呵欠致脫落下脰不得合架口大開而不能咀嚼雖屬上熱下虛實由氣血有虧以致脰筋弛而不收若起于一二日者可治日久則其筋已縱恐難安合矣治用上兜之法先將下脰輕輕托上用紬手巾兜住然後以手揣其搭勾之處令其勾合再用老薑一片置脰車左右穴上以艾丸置薑上用香點灸一再卽可斷根

樞扶氏曰此症由內傷所致宜灸不宜鍼當服歸脾湯加熟地氣血虛者或當歸補血湯主之切勿以喉風諸藥妄投致誤人匪淺也

粟房風

粟米瘡形滿面淫或成大泡痛難禁施鍼用藥依眞法
病者舒眉患不侵

初起發熱滿面紅腫先如粟米黃瘡日久合成大泡先
用荆芥蔥白煎角藥頻洗再以角藥用荆芥煎水調敷
泡上服紫地湯凡初起不可鍼破俟合成大泡以鍼口
向下挑出膿血自效

癰瘰風

癰瘰風生似核形又如癰毒一般稱莫疑此症由冤債
妙藥能除夙孽平

是症自面生起紅腫如小癰毒漸至滿頭俱浮腫生核可用破皮鍼逐個鍼出微血敷以角藥服紫地湯效

穿頷風

病生穿頷不爲祥幸賴仙傳有祕方角藥頻敷湯紫地徐徐圖治莫驚惶

兩腮下紅腫生核或在一邊初生一二枚者易治日久生多透入口內而自穿者多至不治以角藥敷服紫地湯可鍼俟腫甚用鉞鍼刺腫頭出血仍敷前藥

肥株子風

肥株斯疾耳弦生腫痛方知病不情紫正開關兼急進

頻加敷藥立時輕

兩耳墜上浮腫如核或一邊生者外敷角藥服紫地湯加開關散可用鍼鍼核上卽效

掩頸風

左右俄生掩頸風分明赤腫似成癰時人莫作尋常看紫地辛烏有化工

頸項上浮腫生癰或左右或一邊或浮腫上頭敷角藥服紫地湯若浮大赤腫甚者可以鍼腫處

雙纏風

纏喉之症本非奇日久無聲氣道危若見此形宜速退

倉公遇了亦愁眉

初起外頸紅腫至咽喉亦皆滿塞不分紅白漸四圍俱腫先以辛烏散加摩風膏內噙外敷吹赤磨散回生丹服紫地湯加開關散若頸項遍腫及頭亦腫者屬極重症卻可治須開風路鍼如症日久難治切勿用破皮鍼刀

樞扶氏曰此症由膏粱厚味太過致肺胃積熱復受風邪上壅咽喉紅腫緊痛聲音難出湯水不下而痰涎壅塞之聲頗以拽鋸初發暴速宜急鍼少商穴以瀉其熱痰盛者角藥調噙症重者宜服雄黃解毒丸若面青唇

黑鼻流冷涕者皆屬逆症 又有因腎經有熱內枯不能上潤致令心火盛而發是症者內緊外腫潮熱惡寒乃屬實症法宜前治若體虛因思慮太過兼過食五辛而生似此症者其發緩其色淡其腫微咽喉乾燥舌見白胎大便自利六脈微浮重按無力吞嚥疼痛名曰慢喉風乃屬虛症法當從治若午前痛者宜補中益氣湯加麥冬元參桔梗服之午後痛者或作渴身熱足冷此陰陽兩虛也忌用苦寒宜少陰甘桔湯以宣達之若面赤咽乾不渴而微塞痛者其脈必虛太當以清露飲服之兼用青雪丹吹之自然獲驗

單纏風

一邊浮腫證纏單或起頭心或頸間治法詳前須辨識鍼開風路自緩安

初起一邊紅腫作痛左屬心右屬肺或腫頭項或腫頸上治同雙纏風

邊頭風

半邊頭痛苦無休病者何須兩淚流風藥不靈宜補劑管教腫痛去靡憂

此症一邊頭痛如破或左右紅腫如核須鍼風池二穴服紫地散加開關散惟下元虛者多致此疾宜投補劑

以四物湯加白芷服之

虛症不可刺

樞扶氏曰凡頭痛如破前藥罔效者以當歸五錢木通二錢酒煎服下即愈

乘枕風

乘枕風今本不奇若成枕發卻難醫只須急急調敷藥紫地開關服勿離

是症腦後生癰毒紅浮腫痛可用破皮鍼服紫地湯合開關散取效如神

耳防風

附

耳內紅浮痛倍常或膿或血不安康少年若是沾斯疾

定主他年重患殃

此症耳內腫痛或耳外亦紅腫及頭亦痛或耳內出膿血若腫痛甚者至口齒緊閉不能開小便赤短宜用紫地湯加龍膽草木通外敷角藥吹入五行丹卽效

樞扶氏曰以上三十六症妙以一方統治之無不神驗故宜其祕也後之學者務須辨症詳審毋致虛實有差庶不稍誤於萬一耳

祕訣

喉風諸症初起必作寒發熱頭痛大便秘結小便赤瀉以紫正散地黃散合服勿離其藥乃氣血並治能理氣

散血逐風痰不使邪熱壅塞痰涎甚者用角藥調井水
噙口取之使痰涎外湧不停蓄于肺胃兼吹回生丹亦
拔熱邪外出也凡患喉症而誤服涼藥致胸膈如墜不
安者以井水調角藥噙之心煩卽止科內所定方藥總
在攔定風熱在上不下然後隨症治之自獲效神速如
修合諸藥勿宜見火皆生用之吹藥務研極細臨用合
愈妙水劑宜蒸不宜煎以上皆口訣之祕須究心焉

喉風諸方

紫正散

紫荊皮

二錢

荊芥穗

八分

北防風

八分

北細辛

四分
去苗

地黃散 一名內消散

小生地 二錢

京赤芍 八分

蘇薄荷 六分

牡丹皮 八分

牙桔梗 八分

生甘草 六分

淨茜草 一錢

又名紫蘇木

右引加燈心二十節紅內消一錢

卽茜草藤五月五日採取陰乾

以上紫地二散每症合用勿離用開水泡藥蒸服

孕婦去丹皮加四物湯 熱盛者加連翹犀角 頭

痛閉塞加開關散 煩渴加銀鎖匙 潮熱者加柴

胡黃芩 咳嗽加麥冬知母 大便秘結小便赤澀

者加木通 數日不大便者加元明粉 熱壅肺閉

致氣喘促者加麻黃五分先滾去沫再入藥內同蒸

痰稠加貝母 陰虛者合四物湯

開關散 能清諸風止頭目痛

撫川芎 一錢 杭白芷 八分

銀鎖匙 能止煩渴退口燒

天花粉 八分 元參 一錢

四物湯

生地 三錢 當歸 二錢 川芎 八分 白芍 八分 酒炒

鎮驚丸 一名四神散 凡喉症已平兼服此丸

山藥 四兩 桔梗 二兩 梔炭 二兩 甘草 二兩

上氣者加

廣陳皮 二兩

右爲細末米糊爲丸如蓮子大硃砂爲衣每服一丸

薄荷燈心湯化下

辛烏散

一名角藥

赤芍梢

二兩

草烏

一兩

桔梗

五錢

荊芥穗

五錢

甘草

五錢

柴胡

三錢

赤小豆

六錢

連翹

五錢

細辛

五錢

紫荊皮

一兩

皂角

五錢

小生地

五錢

右諸藥味不宜見火置日中晒燥共爲細末收入磁瓶勿令走氣臨用以冷水調噙口內取風痰如神若痰涎極盛加摩風膏濃汁四五匙其力愈速凡頸項及口外紅腫卽以角藥敷之亦可用角藥作洗藥以

荆芥同煎水頻頻洗之洗後仍調角藥敷上若懸痼
風加南星末少許

摩風膏

川烏尖

即大川附子之尖每用尖一個以乳鉢底濃磨汁入角藥

燈心灰

五分

回生丹

即冰硼散

治一切喉證有奇功

大梅片

蓋

麝香

四釐

硼砂

一錢

提牙硝

三分

用蘿
苟同

煮透再攪入清水內露
一夜沉結成馬牙者佳

共研極細末以潔淨爲妙入磁瓶封固臨用挑少許

吹患處

開關後次日並體虛頭暈者即宜去麝香

名品
雪丹

毒腫漸平並用刀破後者再去牙硝

麝硝雙去
者名呂雪

丹加青黛名青雪丹

真功丹 凡孕婦患喉症者宜用此

大冰片二分 真熊膽一錢 陰乾乳細末 用 蘆甘石一錢

用羌活煎湯煨七次飛去腳晒乾用 礪砂一錢 牙硝二分

共乳極細末吹患處 毒腫漸平去硝 刀破後須

用呂雪丹

消蘆散 此方因患者畏刀以此熏破雖易見效不能

速于收功

茜草一兩 金毛狗脊五錢 唐蜜根一兩 卽紫荊皮根

蘆根二兩 去皮

右用米醋同藥貯小罐內以厚紙封口極固放水中煮好口上開一小孔如箸頭大對腫處熏若一時未破加巴豆七粒去壳同入煮再熏神妙若破後不能速于收功吹

生肌散

萬益丹 凡刀誤用致血流不止以此吹上血卽止

滴乳香

一兩 去盡油

沒藥

一兩 去盡油

真血竭

一兩

明礬砂

一兩

研極細末每用少許吹入刀患處效

生肌散

赤石脂

一兩水飛 數次再

乳香

一兩 去盡油

沒藥

三錢 去盡油

輕粉

二錢 五分

硼砂

二錢 五分

龍骨

一兩火煨紅淬 入米醋內水飛

孩兒茶

二錢 五分

大梅片

三分

研極細末每於患處畧用少許

凡病愈之後以六味地黃湯去山萸加麥冬沙參調之
樞扶氏曰以上皆原書祕方也今廣搜諸名家奇方
于後以補是科之不足焉

消瘤碧玉散 專治喉瘤鬱熱之症

硼砂 三錢

冰片 五分

膽礬 四分

共研極細末用時以筋頭蘸藥點患處自效

紫雪散 治一切咽喉腫痛及重舌重腭舌疔等症

犀角尖 兩

石膏 兩

升麻 八錢

羚羊角 兩

元參 兩

甘草 八錢

寒水石 兩

沉香 五錢

剉末

木香 五錢

用水五盃煎藥至約剩一盃將渣用絹濾去再將湯煎滾投提淨朴硝三兩六錢文火漫煎俟水氣將盡欲凝結之時傾入潔淨盃內加下硃砂三錢大梅片一錢金箔一百張各預研細和勻將藥盃安入冷水盆中候冷凝如雪俟乾再研細收固凡大人每用一錢小兒二分十歲者五分徐徐嚥之卽效或用燈心湯化服亦可若咽喉腫痛等症吹之亦效

蠟礬丸 治喉風穿腮出膿者

黃蠟 二兩

枯礬 五錢

乳香 一錢五分

沒藥 一錢五分

去盡油

去盡油

後三味共爲細末卽用黃蠟爲丸每服二錢開水送下

捷妙丹 治雙單蛾風神方

牙皂角

一兩切碎

絲瓜子

二兩錢

二味用新瓦文火炙乾爲細末加冰片少許收固每吹入鼻中打噴二次卽消在左吹右在右吹左雙蛾者左右並吹

嚴氏赤磨散 治一切喉痺纏喉雙單蛾又喉惡證吹之立吐痰涎卽時獲效可代鍼刀真神丹也只喉癰

嚙瘡虛症勿用

眞血竭

五錢

巴豆

七粒
去壳

明礬

二兩

右三味打碎同入新砂鍋煉至礬枯爲度每兩加大梅片三分礬砂二錢共研極細收固用時以冷茶漱
口吹患處立效 樞扶氏曰此環山方岫雲山人家
藏祕方也治喉風諸症實有奇功余經驗屢屢其效
不可勝言

雄黃解毒丸 治一切急喉痺極危症

明雄黃

二兩

川鬱金

二兩

巴豆

十四粒
去壳並去盡油

共研細醋煮麪糊爲丸如棗豆大每服七丸清茶送
下吐去痰涎立效如至死者心頭猶熱灌藥不下卽

以鐵匙挖開口灌之若得下嚔無有不活如小兒驚熱痰涎壅塞或二九三九量大小加減服之亦神效萬應丹 治一切咽喉口舌腫閉並穿腮腐臭延爛等症其驗甚速真神方也

建青黛

水飛去渣
曬乾五錢

雞肫皮

洗炙乾
一錢

牛膽硝

三錢

山梔仁

揀淨仁炒黑
碾細末三錢

黃連末

三錢

生黃芩

三錢

真熊膽

一錢

人中白

取經霜多年者
火煨三次五錢

大紅絨灰

一錢

西牛黃

一錢

雄黃

一錢

青梅乾

煨存性五錢
臨時加纔妙

硼砂

三錢

枯礬

二錢

兒茶

二錢

銅青

二錢

珍珠

一分

以上各研極細末和勻加真麝香五分大梅片七分

再研和勻入磁罐內以烏金紙塞緊口每用少許吹患處日夜徐徐吹之流出痰涎漸愈如有腐臭急用蚌水洗淨或用猪牙草匾柏子和搗加水去渣洗淨再以前藥去青梅乾加滴乳香去油二錢吹用

製青梅法 大青梅一觔去核畧搗碎入白礬食鹽各五錢拌和再加蜒蝣不拘多少層層間之一日夜取梅曬乾收盡汁再曬乾煨灰存性臨用加入

製膽硝法 冬月約入朴硝在黑牛膽內掛在風前一百二十日去皮用硝此乃第一應驗神方也

青冰散 專治喉閉雙單蛾有奇功

膽礬 二錢

礪砂 二錢

共研末取青魚膽一箇將藥末入膽內陰乾去皮再研極細加冰片二分收固每遇喉閉雙單蛾等症以男左女右吹入鼻中自效

火刺仙方 治一切喉痺纏喉脹滿氣塞不通命在頃刻者須急用之

法用巴豆油塗紙上撚作條子火上點着烟起卽吹滅令病人張口急刺于喉間俄然吐出紫血卽時氣寬能言及啖粥飲再用藥隨治之便立愈矣 夫咽喉諸疾發於六腑者如引手可探及刺破或前諸方

治之卽效若發於五臟者則受毒牢深而手法藥力
難到惟用油紙撚刺乃爲第一也蓋熱則宣通故以
火治之火氣熱處使巴油皆到又以火散結以巴瀉
熱邪以烟吐出痰涎此一舉三善之捷法也

碧雪散 治咽喉閉塞痰涎壅盛

燈心灰 二錢

硼砂 一錢

右爲細末每用少許吹入喉中卽吐出痰涎自效

碧玉丹 治喉風急閉等症

膽礬

三錢

白殭蠶

六錢炒去絲
嘴揀直者佳

右爲細末加麝香一分每用少許吹喉中立驗

絳雪

治咽喉腫痛嚙物妨礙及喉癰口舌生瘡等

症

寒水石

二錢

蓬砂

一錢

辰砂

三錢

大梅片

三分

孩兒茶

二錢

爲極細末每用一字摻于舌上津液嚙之或吹患處

真妙方也

金鎖匙

治喉閉纏喉風痰涎壅塞口禁不開湯水難

下等症

焰硝

二兩五錢

礬砂

五錢

片腦

三分

雄黃

二錢

白殭蠶

一錢

各另研細末再和勻收固每吹少許入患處痰涎卽出

推車散 專治牙癰骨槽風生多骨者吹入神效

取推車蟲

卽羌螂

炙研極細末每一錢加入乾薑末五

分同乳細收固每用少許吹入患處孔內若孔內有骨次日不痛而骨自出凡吹過週時而無骨出者則

知內無多骨也

刻歡丹

又名過街笑

專治風火蟲牙疼痛無不神效

蟾酥

一錢

陳酒化透

五靈脂

一錢

麝香

八分

共研極細末和搗爲丸以二百粒爲則卽用新零細

包以絲線紮固再藏磁瓶內每取一丸咬噙于痛牙縫中俟丸化卽痊愈

靈丹 專治一切牙痛無不立驗此不易得之方也

防風 北細辛 黃芩 石膏 元參 羌活

荊芥 小生地 連翹 黃柏 甘草 白芷

白菊花 梔仁 川芎 百部 薄荷

以上各三錢五分

真黃連 一錢

右藥共爲粗末置大銅鍋內外用甘草五錢煎水一大碗將藥拌勻再取潮腦三兩研碎分作五七次用灑藥上再以大碗蓋住藥上又用石膏和灰麪鹽水

調勻密糊碗口不可洩氣煮長香一炷方可起下將
上升在碗的靈丹用竹刀刮下仍將渣用甘草水拌
勻復灑潮腦于上如此升取五七次候藥性升盡爲
度再以磁瓶收固凡牙疼擦上立止如神

症治湯頭備錄

祕授甘露飲 治真陰虧竭火炎灼肺虛損失血內熱
發爲咽瘡喉癰等症

取童便半酒罈要罈口大者先用鐵絲做四股絡子
懸飯碗一箇于罈內約離童便三寸許再用鉛打成
帽笠式倒置罈口上四圍用鹽泥封固外加皮紙數


層糊密勿令洩氣再用磚搭成爐式將罈放上用桑
 柴文武火煉燒一炷香去火候溫再將鉛笠輕輕取
 起勿令泥灰落下則罈中所懸碗內自有清香童便
 露一碗取出另傾茶碗內與病者服下每日早晚共
 服二鍾自有神效 取童便須擇無病無瘡癰者五
 六人每早烹好松蘿茶一大壺令各童飲下俟便出
 時去頭去尾不用取中間者以罈盛之此環山方子
 岫雲祕傳之仙方也識者珍之

鉛笠式

並夢而下轉以
 便單行罈口

罈

式



清露飲 治咽乾寒疼脉虛大者

天冬一錢 志 麥冬一錢 志 生地一錢 熟地二錢 釵斛分

桔梗分 枳壳分 楚 甘草分

右加枇杷葉一片密炙刷 去毛 水二鍾煎八分食後服

少陰甘桔湯 治慢喉風症

元參分 桔梗分 川芎分 柴胡分 廣皮分

甘草分 黃芩分 升麻分

加蔥白一根為引水煎服

黃連解毒湯 治重膠等症

黃連 黃柏 黃芩 生梔子各一錢 五分 水煎服

益氣清金湯 專治喉癰之症

人參 二錢

茯苓 一錢

桔梗 三錢

黃芩 二錢

麥冬 錢半

陳皮 一錢

梔仁 一錢

薄荷 一錢

甘草 一錢

紫蘇 五分

牛蒡子 錢半

炒

川貝母

錢半

加淡竹葉三十片水煎溫服

逍遙散 治肝家血虛火旺頭痛目眩頰赤口苦倦怠

煩渴抑鬱不樂咽喉乾痛無形婦人經水不調脈弦

大而虛

柴胡 一錢

當歸 一錢

白芍 一錢

甘草 五分

白朮 一錢

茯苓 一錢

右水二鍾加煨薑一片薄荷五分煎八分食遠溫服

薛立齋加丹皮一錢 黑山梔一錢

二陳湯 治溼痰為患及骨槽風等症

陳半夏二錢 九製者佳 廣陳皮二錢 去淨白 白茯苓二錢 生甘草一錢

右加白芥子二錢炒研引用生薑三片水煎服

陽和湯 專治骨槽風

大熟地二兩 鹿角膠三錢 石碎隔水頓沖服 上肉桂一錢 白芥子

二錢 炒研末 生甘草一錢 薑炭五分 即炮薑 麻黃五分

麻黃得熟地不發表熟地有麻黃不膩膈神用在斯

水三鍾煎至五分食遠服

陽和丸 專治骨槽風症

上交桂

二兩

黑炮薑

五錢

麻黃

三錢

共研細末煉蜜爲丸每服須加前一陳湯同煎爲妙
本方勿增減出入

犀黃丸 治一切骨槽風并患乳巖瘰癧痰核橫痃肺
癰小腸癰流注等症

犀黃

三錢

乳香

二兩

燈心火油

沒藥

二兩

製同上

眞麝香

一錢

共研細末取粟米飯一兩搗爲丸如菜豆大曬乾忌
烘每服三錢熱陳酒送下飲醉蓋被取汗出醒後癰
消而痛自息矣

附走馬牙疳證

症以走馬名者言其疾速失治卽殞故也蓋齒屬腎與胃相通腎主一身之元氣凡受積熱火毒疔氣卽奔上焦或于痲痘之後及傷寒雜症熱病而成或因平昔過服助陽熱藥並飲毒所中凡初起口氣甚臭名臭息次第齒黑名崩砂盛則齲爛名潰槽熱血迸出名宣露極甚者牙脫落名腐根旣脫齒不復回生矣可見此症貴乎速治也

凡牙疳初起黑爛腐臭出血者宜服蘆薈消疳飲若脾胃虛者宜兼服人參茯苓粥吹以神功丹若痘疹

後餘毒所中者宜服清疳解毒湯外勢輕者俱用人
中白散擦之若堅硬青紫漸腐穿腮齒搖動者宜蘆
薈散擦之凡牙疳見紅血流者吉如頑肉不脫腐肉
漸開掀腫外散臭氣身熱不退俱屬不治

又牙疳五不治症齒落無血者不治腮崩唇破者不
治黑腐不脫者不治臭氣異常者不治療藥不效者
不治

蘆薈消疳飲

蘆薈

生 五分

牛旁子

炒研 五分

元參

五分

桔梗

六分

川黃連

分

薄荷

六分

梔仁

五分

生甘草

四分

升麻 二分

石膏 三錢

羚羊角 一錢 另磨

銀柴胡 五分

加淡竹葉五片爲引水二鍾煎至六分食遠服症重者分兩加一倍

人參茯苓粥

人參 一錢

白雲苓 六錢

共研末同粳米一茶鍾熬成粥先以鹽湯將口漱淨

再食粥

清疳解毒湯

人中黃 五分

川黃連 六分

元參 六分

牛旁子 一錢

北柴胡 五分

防風 五分

生石膏 三錢

犀角 二錢

另磨服

知母 分

生甘草 分

連翹 分

荊芥 分

淡竹葉 錢

加燈心五十寸水二鍾煎服 若嘔吐加蘆根五錢

神功丹 專治一切牙疳有神效

人中白 兩

黃柏 錢

青黛 六錢

薄荷葉 六錢

兒茶 兩

冰片 分

爲極細末日用七八次澀外流不止者吉若無涎則

毒氣內攻卽屬不治之症

每以韭菜根煎水頻漱

煉人中白法 取多年溺壺內底上所起者爲最其

次卽婦人溺桶內所起者亦可無論多寡總取大塊
放磁盆內置屋上任其霜壓雨淋風吹日熾如此一
二年或多年更妙取下放新瓦上以炭火煉紅烟盡
爲度再研細收貯候用愈陳愈妙

人中白散 一名異功散

白雷梅

二錢

人中白

五錢
火煨

枯白礬

二錢

大梅片

二錢

共研細末先用韭根蘿茶煎濃汁乘熱以雞翎蘸洗
患處去淨腐肉見鮮血再敷此藥若爛至咽喉者以
蘆筒吹之

戍骨丹 治走馬牙疳並痘後牙疳

取白色狗屎於長流水中淘出白骨漂極淨瓦上炙黃研極細入麝香少許擦疳上數次愈

蘆薈散

蘆薈

二錢

黃柏

五錢

白人言

等用紅棗五枚去核每蜜納人入言分火燒存性

共研細末先用米泔水漱淨疳毒再敷齒患處效

獨勝丹

治一切牙疳穿腮破唇實有奇效

取白茄蒂不拘多少陰乾瓦上炙燥爲細末加冰片少許收固每吹患處卽愈

紫花散

治小兒口疳神驗

甘蔗皮燒灰研末加冰片一字摻之

赤霜散 專治走馬牙疳延爛穿腮不堪危險之症

用紅棗一枚去核入紅砒如黃豆大一粒紮好放瓦上炙至棗上起白烟俟烟盡取下蓋熄候冷加冰片一字研極細吹患處效速如神若久爛之孔亦能生肌捷速也

聖功丹 治一切牙疳有奇效

硼砂

分

蒲黃

分

人中白

分

馬勃

分

兒茶

分

甘草節

五厘

僵蠶

五厘

冰片

五厘

麝香

厘

右爲細末收固水漱口淨吹之數次卽愈 此方出于岫雲山人而其功效過于神功丹人中白散諸方

若疳重加青黛黃柏等分

保元丹 凡牙疳久不愈者吹之無不神驗

取稻草不拘多少密紮成把候冬至日放露天糞缸內至春分取起于長流水中洗淨污穢置屋上任日熾雨淋雪壓愈陳愈妙再將草燒成黑灰研末每兩加水片三分和乳極細吹患處立效

樞扶氏曰以上牙疳諸方乃廣搜各名家要義及友人祕授者皆經應驗之方也後之治者認症勿差用藥勿錯安有不效至于臨症變通又存乎其人耳

梅澗醫語 論喉間發白疳

喉間發白之症予經歷十餘俱已收功此症屬少陰一經熱邪伏其間盜其肺金之母氣故喉間起白緣少陰之脈循喉嚨繫舌本治法必以紫正地黃湯爲主方除紫荊皮茜草二味此二藥開結破肝血之燥熱今喉間之白因邪伏于少陰腎經蓄久而發肝失水養非喉本症風熱結于血分可比故此二藥最不相宜用之復傷其陰而白反瀰漫不解只用紫正湯微加細辛清解少陰之邪初服一二劑其白不增不減畧轉微黃色十有九治若服藥後白反蔓延嗆喉是邪伏腎經腎陰已傷元氣無從送邪卽不治矣 此症服藥大便解出結糞

地道通而肺氣行邪從大便出其白卽轉黃色七日後愈矣可知邪伏少陰盜其母氣非臆度也

又論喉間發白治法及所忌諸藥

喉間起白如腐一症其害甚速乾隆四十年前無是症卽有亦少自廿年來患此者甚多惟小兒尤甚且多傳染一經誤治遂至不救雖屬疫氣爲患究醫者之過也按白腐一証卽所謂白纏喉是也諸書皆未論及惟醫學心悟言之至於論治之法亦未詳備緣此症發于肺腎凡本質不足者或遇燥氣流行或多食辛熱之物感觸而發初起者發熱或不發熱鼻乾唇燥或咳或不咳

鼻通者輕鼻塞者重音聲清亮氣息調勻易治若音啞
氣急卽屬不治近有好奇之輩一遇此症卽用象牙片
動手于喉中妄刮其白益傷其喉更速其死豈不哀哉
余與旣均三弟療治以來未嘗誤及一人生者甚眾經
治之法不外肺腎總要養陰清肺兼辛涼而散爲主
養陰清肺湯

大生地

二錢

麥冬

一錢二分

生甘草

五分

元參

錢半

貝母

分

丹皮

分

薄荷

分

炒白芍

分

不用引

質虛加大熟地或生熟地並用熱甚加連翹去白芍

燥甚加天冬茯苓

如有內熱及發熱不必投表藥照方服去其熱自除

吹藥方

青菓炭

二錢

黃柏

一錢

川貝母

一錢

冰片

五分

兒茶

一錢

薄荷葉

一錢

鳳凰衣

五分

各研細末再入乳鉢內和勻加冰片乳細

喉間起白所切忌藥味

麻黃

誤用咽啞不可救

桑白皮

肺已虛不宜瀉

紫荊皮

破血不可用

防風

不可用

杏仁

苦降更不宜

牛蒡子

能通十二經不可用

山豆根

不可用

黃芩

過清涼

射干

毒角即啞

花粉

不可用

羌活

過發表切不可用

桔梗

肺虛不宜升

荆芥

不可用

咽喉諸症禁忌

凡咽喉諸症切不可發表虛症不宜破血

暫受風寒喉痛治法

清解湯

防風

八分

桔梗

八分

牛蒡子

八分

甘草

五分

秦艽

一錢

川芎

五分

薄荷

五分

枳殼

八分

當歸

一錢

引加蔥白二寸宜停葷腥

重樓玉鑰卷上